

陶雲汀先生奏疏

奏疏卷三十一目錄

江督稿

安化陶

恭謝

御賜福壽字暨麕鹿肉摺子

接受兩淮鹽篆謝

恩摺子

籌議稽察商人及鹽務官員各情形摺子

請

勅湖廣河南江西安徽各督撫一體巡緝疏銷摺片

保薦堪勝運司之員請暫行陞署摺子

覆奏儀徵掣捆夫役跪求摺子

籌議加勛減價兼疏積引摺子

挈獲梟匪私立馬頭併護夥抽費各犯懇

恩鼓勵出力人員摺子

請陞補沿河要缺知府摺子

繳鹽政養廉裁減浮費摺子

捕獲盜匪倭梟分別委審懲辦摺片

覆查運庫墊佔銀數相符俟分別歸補摺子

運庫積年混淆情形摺片

動撥貧民口糧銀款摺子

酌擬鹽務人員改補調署章程摺子

孟瀆河工程請緩至來年接續興挑摺片

趕赴清江浦催放重運漕船摺片

恭謝

御賜福壽字暨鹿鹿肉摺子

奏爲恭謝

天恩事頃摺弁回省賚奉

御書福字一幅壽字一幅鹿鹿肉一分

頒賞到臣謹卽恭設香案望

闕叩頭祇領迎年標百順之名百適

曼羨獻歲普三江之澤

三錫

恩多欽惟我

皇上調泰延洪

臨宸播凱九五福曰壽欣開

壽寓以均禮八千歲爲春更

廣春臺而納祿當瑞雪紛敷之際龍鸞飛灑於

璇毫正

威霆迅掃之時狐兔猶登於

御俎

微臣

星雲快睹

膏露親嘗展

義畫以宜春飫

堯廚而徧

德戩穀上

東海

南山之頌笙簧用答鹿鳴

惠迪應安平康樂之書官禮無非麟意情殷華甸

三多敬祝

聖人春到江城萬戶羣游

皞日所有臣感激忭幸下忱謹繕摺叩謝

天恩伏乞

皇上聖鑒謹

奏

道光十年十二月二十六日具

奏十一年正月二十一日奉到

硃批知道了欽此

接受兩淮鹽篆謝

恩摺子

奏爲接受兩淮鹽篆竝陳現辦情形恭謝

天恩仰祈

聖鑒事竊臣於本年正月初二日接准吏部知照內

閣抄出道光十年十二月二十一日奉

上諭兩淮官引滯銷釐務疲敝現據王鼎等奏稱由
鹽政無管轄地方之責文武員弁均非所屬疏銷
巡緝難期令行禁止着將兩淮鹽務改歸兩江總
督管理所有鹽政一缺着卽裁撤鍾靈着回京當

差其會議酌定章程着照所議辦理等因欽此欽
遵轉行知照茲於正月十三日由臣鍾靈將兩
淮鹽政印信文卷等項委員賫送到省臣謹卽
恭設香案望

闕叩頭祇領任事伏查兩淮鹺務攸關六省民食
爲引一百六十九萬餘道爲課四百餘萬兩加
以外支各款每歲不下二百餘萬兩合計錢糧
足抵數省之地丁我

朝體恤商丁至優極渥緩急輸將亦惟兩淮爲最
盛雖中間偶有衰歇從未有如近時之竭蹶異

常溯其潰壞之由自二十年前已逐漸就頽有
江河日下之勢迨及近歲而決裂日甚至上年
而掃地罄盡庫儲業已全空外欠猶然叢集四
千餘萬之舊逋無從歸完一千餘萬之借本悉
化烏有而且商情疲乏浮議繁多把持咀嚼無
敢過問公私倒置遂至於斯臣於上年九月接
奉

恩旨簡擢兩江總督卽經察訪利弊縷悉具陳旋蒙
欽派戶部尙書王鼎侍郎寶興來江會議兩月以來
益悉其中敝壞情形覘縷難盡所議酌定鹽務

章程十五條業蒙

俞旨准行惟是積弊之餘章程甫立節目尙多如裁
浮費去根窩慎出納禁淹消散輪規減價蔽私
諸條皆商情所不樂謗口所易騰一時未必帖
然自應申明

國法從實妥辦一有瞻玩卽併其從前弊混之罪
追革查抄究治方足以資整頓至文武員弁向
於鹽務往往視同膜外疏銷巡緝不肯認真出
力甚至得規包庇尤堪痛恨

功令森嚴必應整飭所難者兩淮彫弊已極現在

商人力能辦運者不過二三十家而新商辦運
稍生非刪減繁文禁除科派絲毫不令受累不
足以廣招徠展轉僉募尙需時日兼之漢口積
引不下數千萬兩非三兩月所能罄盡江西情
形亦然前綱旣滯則辛卯新鹽卽截清界限於
春月開綱而行抵楚西各岸已在夏秋之際明
歲奏銷勢不能如期完竣不得不預行陳明其
餘未盡事宜容臣隨時察看奏咨辦理俾歸有
濟總之鹽務敗壞至此本由數十年來積漸而
成此時整頓舊章實與重新起造無異亦必由

漸而入始能復原臣渥受

特恩捐糜圖報分所當然任勞任怨更不敢辭而辦理不能無序兼臣管理三江職任較繁吏兵河漕刻費經營茲復以鹽務兼轄之責改爲專管駑駘勉策深懼弗堪惟有仰懇

恩慈

俯賜訓誨俾資循奉庶幾力圖振刷藉期起色裕

國便民漸復舊制所有臣感凜下忱謹繕摺恭謝天恩伏乞

皇上聖鑒謹

奏

道光十一年正月十三日具

奏二月初十日奉到

硃批另有旨欽此先於二月初六日奉到正月二十

七日奉

上諭陶澍奏接受兩淮鹽篆竝陳現辦情形一摺據稱兩淮鹽務積弊之餘章程甫立節目尙多如裁浮費去根窩慎出納禁淹消散輪規減價敵私諸款皆商情所不樂應申明國法從實妥辦一有瞻玩卽併其從前弊混之罪追革查抄至文武員弁

向於疏銷巡緝不肯認真出力甚至得規包庇必
應整飭等語現當整頓之際功令森嚴該督務須
實心查辦力除積弊俾各商及員弁等咸知儆畏
於銷引緝私方有裨益至所稱現在商人力能辦
運者不過二三十家新商僉募尙需時日兼之漢
口積引不下數千萬兩非兩三月所能罄盡江西
情形亦然前綱既滯則辛卯新鹽卽截清界限於
春月開綱而行抵楚西各岸已在夏秋之際明歲
奏銷勢不能如期完竣等語自係實在情形所有
明歲奏銷着准其稍寬時日屆期奏明辦理此後

仍當年清年款不得復蹈故轍其餘未盡各事宜
竝著該督隨時察看分別奏咨核辦該督身受重
恩總當任勞任怨悉心籌辦力圖振刷以期鹽務

硃

日有起色勉副委任方爲妥善將此諭令知之欽

此

諒該督亦必不肯甘蹈故轍等之覆轍也

籌議稽察商人及鹽務官員各情形摺子

奏爲遵

旨籌議稽察商人及鹽務官員各情形仰祈

聖鑒事竊臣承准軍機大臣字寄道光十年十二月

二十一日奉

上諭據王鼎寶興奏請將兩淮鹽務改歸總督管理
又會同該督籌議鹽務章程各一摺已明降諭旨
將鹽務改歸該督管理並裁撤兩淮鹽政一缺所
有會同酌定鹽務章程十五條均照所議行其餘
未盡事宜仍著隨時察核分別奏咨辦理惟該督

駐劄江寧兩淮商人均在揚州居住相距較遠稽
察難周恐有鞭長莫及之勢着該督體察情形妥
爲籌議至鹽政旣經裁撤其鹽務官員期於敷衍
而止多一冗員卽多一浮費竝着該督酌加裁汰
以歸核實等因欽此伏查鹽務轉運一切條款細
目收放出入全在運司經理得人向來鹽政所
職惟有挈領提綱綜攬全局發蹤指示不必日
與商人謀面臣蒙

天恩簡任兩江事務較繁不能常駐江寧每遇閱兵
防汛漕艘渡黃時復經過揚州其鹽政舊署卽

可改爲行轅酌留書吏承差數名隨署辦事其餘巡捕官等及雜項人役卽可全行裁撤以省繁費至鹽務官員除場所大使外僅有南北監掣二員通州海州泰州運判三員運司經歷知事庫大使各一員巡檢二員額缺甚少僅敷辦事之用似難裁省惟候補分發人員太多薪水支絀補缺無期容俟另籌通變或改歸地方或回籍候調其現任各員前於會議章程內聲明請照州縣之例察看人地隨時調換務令相宜惟現當整頓之際尙或無可調換應請卽於地

方官內酌量遊員調署俾資振作其餘未盡事宜容臣察看情形陸續奏咨辦理俾歸妥協所有臣接奉

諭旨籌議緣由理合恭摺覆陳伏乞
皇上聖鑒訓示謹

奏

道光十一年正月十三日具

奏二月初十日奉到

硃批另有旨欽此同日奉到道光十一年正月二十七日內閣奉

上諭陶澍奏籌議稽察商人及鹽務官員各情形一摺兩淮鹽政現經裁撤所有巡捕官等及雜項人役俱着全行裁撤以省繁費至鹽務官員除場所大使外僅有南北監掣二員通州海州泰州運判三員運司經歷知事庫大使各一員巡檢二員額缺甚少着無庸裁省其候補分發之員人數太多着該督另籌變通或改歸地方或回籍候調酌量辦理至現任人員卽照州縣之例隨時察看量爲調換務期人地相宜倘或無可調換着於地方官內遴員調署以資振作該部知道欽此

請

勅湖廣河南江西安徽各督撫一體巡緝疏銷摺片
再准鹽疏銷巡緝責在地方文武茲蒙

諭旨歸臣管理臣自應督率文武竭力整頓惟是兩

淮地方係發鹽之所其銷鹽口岸散在各省以
湖廣江西爲最鉅此兩處均有岸商把持壟斷
浮費繁多現在引鹽積滯阻碍新綱臣與王鼎

寶興日前籌議已遴委鎮江府知府王青蓮赴
楚岸候補鹽運判石產瑚赴西岸各帶委員前
往會同地方官催辦散輪以期銷路疏通惟是

楚西兩省行銷引地南逮五嶺西盡三峽水陸
交錯實爲綿遠江西雖臣所轄已覺鞭長莫及
湖廣文武則非臣統轄河南之一府三州亦然
其間川私粵私閩私潞私蘆私莫不侵灌淮綱
四面受敵疏銷巡緝最關緊要在各省督撫整
飭紀綱斷無不認真稽查惟恐文武員弁徂於
積習視同局外漫無責成是銷路不暢仍於兩
淮鹽務無濟難期起色合無仰懇

皇上天恩

勅下湖廣總督江西河南安徽巡撫一體嚴飭地方

文武專以責成於淮鹽行銷引地設法疏通併力巡緝庶幾無分畛域齊心整理以裕

國課而於各省民食亦可期便益矣臣爲大局起見謹據實附陳請

旨施行謹

奏

道光十一年正月十三日具

奏二月初十日奉到

硃批另有旨欽此同日奉到道光十一年正月二十

七日內閣奉

上諭陶澍奏淮鹽行銷引地散在各省請飭一體巡
緝等語兩淮鹺務疲敝已極其銷鹽口岸散在湖
廣等省現當整飭之時巡緝疏銷最關緊要該督
撫等自應督率各地方官一體認真查辦第恐該
員弁等狃於積習視同局外漫無責成是銷路不
暢仍於淮綱無濟難期起色著湖廣總督江西河
南安徽各巡撫嚴飭地方文武員弁無分畛域併
力巡緝該督撫等各就該地方情形分別滯銷暢
銷明示懲勸妥議章程具奏俾賞罰功過責有攸
歸以免推諉而肅鹺政欽此

保薦堪勝運司之員請暫行升署摺子

再臣接奉

諭旨以新任運使楊振麟是否妥協勝任

勅令

臣

詳加察看如該員未能辦理裕如著將平素

深知者酌保一員奏請等因欽此查楊振麟由廣

東道員升調兩淮上年十月內經臣與前鹽臣

奏催赴任至今尙未來江無從察看此時鹽務章

程甫立一切未遑刻須籌辦新綱而商疲力乏

彫敝萬分整理維艱旁觀望而却步非得真實

任事不畏難不避怨者弗克當斯劇任臣再四

陸雲門先生奏列選書一
思維實難其選惟查有江寧府知府俞德淵清
淳練達猷守兼優臣所深知雖於鹽務向非熟
習觀其平日辦事有體有用條理分明堪勝兩
淮之任惟查運使一缺例由俸深道府升補該
員俞德淵在知府任內歷俸未滿三年可否升
補抑或暫行升署之處伏候

聖裁又前署運使降調道員王鳳生昨經會議

奏畱委辦場竈事宜該員勤明篤實素著清聲亦
堪重任惟係甫經降調之員應俟場竈一切事
宜辦竣再行奏明量請

恩施所有臣遵

旨酌保堪勝運使緣由謹附片具

奏伏乞

聖鑒訓示謹

奏

道光十一年正月十三日附

奏二月初十日奉到

硃批另有旨欽此同日奉到道光十一年正月二十
七日內閣奉

上諭兩淮鹽運使員缺著俞德淵升署楊振麟著來

京交吏部帶領引見欽此

覆奏儀徵掣捆夫役跪求摺子

奏爲接奉

諭旨據實覆

奏事承准軍機大臣字寄道光十年十二月二十

日奉

上諭本日據史致儼吳椿竝御史卞士雲奏接到儀徵縣紳士公信據稱向來淮南綱食引鹽俱歸儀徵掣捆數萬夫役得受傭資以敷口食因聞有鹽課改歸場窳之議夫役人等恐嗣後掣捆不歸儀徵頓失生計約會千數百人赴縣奔訴該知縣已

往省代稟等語兩淮鹽務敝壞已極朕特派王鼎等前往江南會同陶澍查辦其課歸場竈一節前據王鼎等具奏大概情形已委員查勘尙未據覆奏該夫役等一聞此信恐失生計遽行約會多人赴縣奔訴實是愚民無知此事關係大局該尙書等務細心籌議如果改歸場竈實有裨益卽核實會辦妥立章程不可因該夫役等口食無資遂存畏難苟安之見但事屬改轍更張必期經久可行毫無格碍斷不可稍滋流弊以致激成事端總當體察情形酌量可行與否定議具奏史致儼等所

呈原信著發給閱看將此諭令知之欽此仰見

聖訓周詳莫名欽感伏查兩淮鹽務爲游民衣食之場平時依倚商門苟圖溫飽者蟻附蠅營不可勝數遇有整頓慮不便於若輩或編造歌謠或捏成蜚語頃刻傳播混圖挾制掣肘多端由來已久卽如黃玉林不過一緝私眼線之人同夥幾何乃稱其江海連絡呼吸千里相通憑空捏造搖惑衆聽如果屬實則黃玉林正法時豈得無一人過問臣王鼎寶與駐江兩月始悉底裏所見與所聞迥不相符此次儀徵捆夫跪求該

縣王用賓於十二月初四日進省經臣面詢不
過愚民無知恐捆鹽失業焚香跪求則有之何
至如紳士所云四五千人哀求乞命哭聲滿路
市鋪關歇貨物不通且查閱書信內稱就場沽
賣掣捆不在儀徵生計全無死亡立見現已搶
奪公行民難安堵愴切不忍罄言又云星使同
駐省城風聞事在必行當此迫不終日之勢又
萬無可解之機重賴拯援化凶爲吉等語無論
跪地哀求與搶奪公行情形不類且搶奪必有
報案何不指列姓名徒托空言

殊

國家大計如果謀歸場竈有益豈能任無知愚民

所諭其

殊

把持阻撓臣於王用賓來見時卽飭令訪拏倡

所辦甚好

求首犯數人照律究懲以儆刁風至兩淮藉鹽
爲食之人不下十數萬衆不獨儀徵爲然臣等

初次覆奏摺內卽聲明捆鹽搬壩夫役繁衆一
旦失業無賴必多早已籌慮及此祇因辦理嚴
密外間無從探聽致該紳士虛抱杞憂揚州風
氣浮僞卽此可見現在鹽務章程已定毋庸更
議民情均極枚謚臣王鼎寶興臨行接奉

諭旨移交臣縷悉具陳謹據實覆

奏仰紆

宸注所有史致儼等抄呈紳士書信一併附繳伏乞
皇上聖鑒謹

奏

道光十一年正月十三日具

奏於二月初十日奉到

硃批知道了欽此

籌議加勦減價兼疏積引摺子

奏爲籌議加勦減價以速新綱兼疏積引裕課便

民仰祈

聖鑒事案查兩淮鹽引積滯由於成本過重賣價增
昂以致私販盛行截流必先清源經臣會同臣

王鼎臣寶興

奏請釐剔舊章首重裁革浮費減定根窩以輕運
本卽以輕賣價如科則項下已丑綱向定每引
五兩二錢零現於外支辦公等費約裁減銀六
十萬餘兩每引減爲四兩一錢零又於商人成

本各款內革除規費銀約二百萬兩向併科則
每引該銀十二兩三錢零現減爲每引十兩二
錢零均係核實釐定實已無可再減惟是按引
計勛核算每勛賣價所減祇及一分較之私鹽
賤價尙屬懸殊不足以敵私兼場商近多消乏
不能收鹽久貯鹽質甚嫩滷耗尤多迨沿途盤
運解捆掣驗拋灑消耗更鉅是以從前商人赴
場捆運每引於定額三百六十四勛之外仍帶
加三配割及

恩免課鹽二十勛尙有包內所帶之私不下百數十

勛通計每引幾至五百勛有零暑月加耗不在其內比之原額數甚浮多公私混淆漫無稽察歷來辦鹽非不知其有弊祇因拋灑等耗不能不藉資彌補其每包多帶鹽勛所省課銀無幾所省運腳甚多然且辦運竭蹶今當立法之初事期核實若全行裁革祇准照三百六十四勛額引摺運每引遠少鹽百數十勛而每包運腳仍不能少則商人無利可圖難免虧折不特不能減輕賣價更恐暗又增高於疏銷轉有窒碍若復因循舊貫陽奉陰違更非整理積疲之道

陝西通志卷之三十一
伏查鹽法志載雍正二年前兵部尙書盧詢

奏准加餉減價每引加鹽五十觔又兩淮鹽引自
嘉慶十年加十觔不入成本以補虧折道光七
年

奏准連新舊加鹽二十觔扣足三年停止上年九
月限滿前鹽政臣福森奏請展緩三年經戶部
議駁各在案是加餉減價敵私及不入成本以
補虧折歷經

奏辦有案當此商情疲敝已極若責令照額捆鹽
自行賠補拋耗既勢有未能非裹足不前卽百

計遮掩仍圖夾帶隱佔新綱無補課額因思場
竈之所乏者非鹽苦於鹽多無售以致偷漏販
私民間亦非樂於食私苦於鹽價太昂遂至貪
圖買賤自

國家定額以來生齒日繁而引不加增鹽反滯銷
者固由梟販充斥亦商人之暗中夾帶實甚彼
既瞞官不瞞私費愈多而利益薄因之銷鹽不
銷引課既絀而商亦窮積敝至此與其暗中夾
帶不如明予加勸蓋暗帶則挾制者衆而虛耗
轉以虧官明加則稽覈易行而貼補可期減價

疏新導滯無逾於斯臣與署運司悉心察訪再
四籌商惟有據實

奏明每引捆鹽酌爲加數以五百觔出場除額鹽
三百六十四觔外仍照案仰乞

天恩賞加鹽二十觔併例給暑月滷耗十六觔作爲
常年拋灑照例准其免課不得再加暑耗名目
其餘所加一百觔查庚寅未行綱引及己丑未
完積引三分前經

奏明隨時帶銷應請卽以此項帶銷之鹽作爲新
引加觔照依新綱科則每觔完納正課錢糧其

餘外支雜費卽無庸加派約計本綱可帶完前
綱正課銀五十餘萬兩不及五綱卽可將已丑
庚寅未完正課帶補全完再行接補應帶雜徵
銀兩如此則積引旣可漸清加勛亦歸有著商
力竝得稍紓兼裕數十萬之課項借以彌補舊
欠緊款所有賣鹽價值卽可照現數覈辦計每
勛又可遞減五六釐統計前後減數足以敵私
民間自不致再圖食賤而餘鹽有收卽窮苦竈
戶亦藉資蘇息商運轉輸不致吃力當可踴躍
急公無虞窒滯其鹽勛經過泰壩儀徵等處原

有稽查稱掣舊章經臣等

奏明掣定秤桿認真盤驗使其無從夾帶茲復明
定加勸商人無可藉口自不難從實覈辦如再
有顆粒私增定卽嚴提重懲以絕隱私而裕

國課兼便閭閻臣因鹽引新舊積滯亟思補救疏
通之法謹援案據實請

旨恭摺具

奏伏乞

皇上聖鑒訓示施行再淮北捆運情形容俟悉心籌
察另行覈辦合併陳明謹

奏

道光十一年正月二十七日具

奏二月二十四日奉到

硃批戶部覈議具奏欽此

戶部議

奏查兩淮引額三百六十四觔近年各場捆鹽多者幾至加倍總由商人成本過重往往逾額捆觔藉資彌補其始未嘗無利迨後人人知其有弊挾制勒索之端亦卽由此而起遂至節節把持層層剝削卒至鹽銷引滯課旣絀而商亦疲

上年臣王鼎臣寶興前往江南會同該督籌辦
鹽務即將商人引鹽夾帶情形奏陳

聖鑒竝請減輕成本嚴定章程以期鹽不虛銷而課
歸實納茲據該督以每引成本定爲十兩二錢
零實已無可再減仍不足以敵私若令照額捆
運每引遠少鹽百數十觔商人難免虧折若復
因循舊貫陽奉陰違更非整理積疲之道據實
奏請酌爲加數以五百觔出場係爲覈實捆觔
剔除積弊起見現當立法之始自應籲懇

天恩俯如所請准其照案仍加鹽二十觔竝暑耗十

六劬作爲常年拋洒免其納課其餘所加一百
劬以帶銷庚寅未行綱引及己丑未完積引三
分作爲新引加劬照依新綱科則完納正課俟
帶補全完再行接帶雜徵銀兩嗣後捆運鹽劬
均不得另加滿耗名目統以五百劬出場俾辦
運不致掣肘而帶款亦可漸次清完惟淮鹽自
乾隆年間兩次加鹽二十劬已在原額三百四
十四劬之外此次又請將從前暫加之二十劬
永遠

賞給並將暑耗覈入常年額引數內每引共加至三

十六觔俱係無課之鹽不入成本計算此外所
加一百觔雖依新綱科則完納正課覈其所完
之數每引亦僅三錢有零較之新定科則不過
四分之一非現當大加釐剔實力整飭之際亦
斷不能邀此

逾格恩施統計前後釐定鹽價每觔遞減至一分五
六釐成本業已大輕銷路自當加暢現在兩淮
鹽務專歸該督管理督銷旣責無旁貸墮課亦
咎有攸歸當嚴飭商人激發天良趕運趕銷勿
使稍有絲毫影射弊混以仰副

聖主恤商便民之至意倘於此次加定勦額之外再有私增仍蹈隱佔舊習或行銷一二年後復以鹽多壅滯爲詞又思更變則是徒爲混飾彌縫之計而非覈實經久之方尤當先事熟籌力防流弊應請

勅下該督將如何稽察運銷實在可以敵私杜弊之處立定詳細章程務使

國課無虧年清年款商民兩有裨益以裕轉輸而行久遠至淮北捆運情形應併令該督迅卽悉心籌議具奏毋得遲延等因奉

旨依議欽此

拏獲梟匪私立馬頭併護夥抽費各犯懇

恩鼓勵出力人員摺子

奏爲拏獲梟匪私立馬頭併護夥抽費各犯懇

恩鼓勵出力人員以昭激勸仰祈

聖鑒事竊照海州地近場窳向多匪徒設巢護私抽

費最爲淮綱之害雖屢經獲犯懲辦而利之所

在每易潛滋經

臣

嚴飭地方文武整頓精神實

力查拏茲據署海州知州事邳宿運河通判謝

肇瀛護理海州營叅將漕標守備陸棠稟稱訪

有夏天輔等佔立馬頭護梟抽費之事卽帶領

員弁兵役於十一月二十五日親往陡溝地方圍拏詭匪徒竟敢持械迎拒該員等奮力上前四面兜拏匪徒畏懼奔散當獲夏天輔等犯十七名併搜獲鎗械五十一件私秤一桿私鹽七萬三百劬訊係夏天輔起意爲首自充大仗頭李從樑爲副仗頭於十一月十五日設立馬頭護送私鹽抽費分用不諱其持械迎拒亦係夏天輔起意主使等情臣查夏天輔起意糾夥開設馬頭架護私梟抽費實屬愍不畏法已飛飭該管之淮海道親提督審嚴辦併勒緝逸犯務

獲併究不使稍有輕縱惟該州謝肇瀛等於匪犯甫設馬頭護梟卽能訪知的確督帶兵役直抵巢穴不避迎拒之衆立時擒獲首夥十七犯併私鹽七萬餘觔鎗械多件實屬留心地方緝捕勤能覈與部議鹽在五干觔以上人數多至十餘名應從優保奏之章程相符且現當整飭淮網緝私緊要該州等所獲各犯爲害鹽務地方較之大夥梟販更鉅若沒其微勞殊不足激勵人才而收羣力相應仰懇

天恩將署海州知州邳宿運河通判謝肇瀛交部從

優議敘護理海州營叅將漕標中軍守備陸棠
以應陞之缺陞用以示鼓勵除隨同出力弁兵
由臣分別記功獎拔外理合會同署漕運總督
臣吳邦慶恭摺具

奏伏乞

皇上聖鑒訓示謹

奏

道光十一年正月二十七日具

奏二月二十四日奉到

硃批查拏甚屬認真另有旨欽此同日奉到道光十

一年二月十一日內閣奉

上諭陶澐奏拏獲梟匪私立馬頭併護夥抽費各犯請將出力人員鼓勵一摺江蘇署海州知州事邳宿運河通判謝肇瀛護理海州營叅將漕標守備陸棠訪問夏天輔等佔立馬頭護梟抽費立即督率兵役擒獲首夥各犯十七名併搜獲私鹽七萬餘觔鎗械多件緝捕尙屬勤能謝肇瀛着交部從優議敘陸棠着以應陞之缺陞用以示鼓勵該部知道欽此

請陞補沿河要缺知府摺子

蘇撫會稿

奏爲沿河要缺知府需員恭懇

聖恩俯准陞補以禪地方仰祈

聖鑒事竊照徐州府知府潘楨因失察戶部假照案
開缺所遺徐州府知府係沿河衝繁難兼三要
缺例應由外揀選題補該府毘連豫東安徽三
省爲盜梟出沒之區民風強悍訟獄繁多且瀕
河臨運各省漕船經由總滙必得精明幹練熟
悉地方之員方足以資治理臣等與藩臬各司
逐細揀選惟查有太湖廳同知劉鴻朝年四十

七歲山東進士由內閣中書奉

旨記名外用道光五年選授江蘇太湖同知六年八月到任嗣因勸挑鵬鵝河等處水利工程認真出力十年七月奉

諭旨賞加知府銜欽此補行卓異引

見奉

旨劉鴻翔准其卓異加一級仍註冊回任候陞欽此該員勤明幹練有守有爲在江多年緝捕催漕各事宜均所熟悉又係奉

旨候陞之員以之請陞徐州府沿河要缺知府洵堪

勝任與例亦屬相符據藩臬各司具詳前來臣
等往返札商意見相同合無仰懇

皇上天恩俯念員缺緊要人地實在相需卽以該員
陞補徐州府知府於地方實有裨益臣等亦獲
收指臂之助如蒙

俞允該員卓異引

見未滿三年遵例毋庸送部且應陞之員請陞要缺
亦毋庸覈計處分仍飭查該員任內如有罰俸
案件照例勒限完繳另行造冊咨銷所遺太湖
同知係屬選缺江蘇省現有應補人員容另遴

員請補合竝陳明臣等謹會同江南河道總督

臣張井合詞恭摺具

奏伏乞

皇上聖鑒訓示謹

奏

道光十一年正月二十七日具

奏二月二十四日奉到

硃批另有旨欽此同日奉到道光十一年二月十一

日內閣奉

上諭陶澍等奏請陞補沿河要缺知府一摺著照所

請江蘇徐州府知府准其以劉鴻翔陞補該部知
道欽此

繳鹽政養廉裁減浮費摺子

奏爲恭繳鹽政養廉裁減衙門浮費仰祈

聖鑒事竊照兩淮鹽務欽奉

諭旨改歸總督管理所有鹽政每年額支養廉銀五

千兩向在雜款應解項下動支惟查

臣

本任總

督養廉已極優厚併有例支

恩賞辦公之泰壩永豐壩公費已足敷用是以

臣於

上年到總督任後卽將鹽務向送賞需銀二萬

兩全行裁革此時鹽務改歸其鹽政養廉銀五

千兩應行恭繳歸入節省項下解交戶部充用

至鹽政衙門浮費較多前經戶部臣王鼎臣寶

興會同臣分別裁減在案茲鹽務改歸總督管

理更應大加刪減除緝私賞號不能全無前經
裁減四成外其經書人等有辦理稿件之責衙
門雖裁辦事如舊人數未能多裁現將工食裁
去四成其餘酬酢巡捕匠作結綵涼篷聯額作
坊坐船浴堂橋旗撲毬掉轎廚夫藥匠鐘表裝
潢匠等項全行裁汰此外執事人役應需辛工
紙張飯食有應全裁者有應歸併者有應酌留
者均經細加釐定統計鹽政衙門前後裁減每

歲費用銀十六萬兩有零至外支浮費及運司

衙門濫支各項應飭查明一併刪減

臣仰荷

天恩委任惟有身先節省隨事留心以期省一分之
浮費卽減一分之鹽價庶官引得以暢銷民商
均歸便益仰副我

皇上整飭紀綱之至意所有恭繳鹽政養廉及裁減
衙門浮費緣由謹繕摺具

奏伏乞

皇上聖鑒謹

奏

道光十一年正月二十七日具

奏二月二十四日奉到

硃批所奏甚是另有旨欽此同日奉到道光十一年
二月十一日內閣奉

上諭陶澍奏恭繳鹽政養廉裁減浮費一摺所奏甚
是兩淮鹽政每年額支養廉銀五千兩向在雜款
應解項下動支現在鹽務改歸總督管理其應支
總督養廉優厚足敷辦公所有鹽政應支養廉銀
兩著歸入節省項下解交戶部充用至鹽政衙門
浮費較多除緝私賞號及經書人等工食均裁減

四成巡捕匠作等項全行裁汰此外執事人役應
需辛工紙張飯食分別裁併酌畱統計前後裁減
每年費用銀十六萬兩有零其外支浮費及運司
衙門濫支各項俱著查明一併刪減該督務當隨
時整頓以節浮費而暢引銷欽此

捕獲盜匪侂臬分別委審懲辦摺片

再除莠所以安良緝私所以疏引攸關緊要

臣

疊飭地方文武隨時密行訪拏以靖地方據各屬陸續破獲梟匪多起當交該府縣切實根究併將出力員弁分別記功獎拔其尤爲出力者存俟

奏明鼓勵茲據護理遊兵營遊擊趙瑾稟報督率弁兵在江巡見匪船二隻各匪持械拒捕隨奮勇追擒立將盜匪葉朝盛等十六名全行拏獲當於船內搜獲被匪拐擄之婦女幼孩二十名

口併人耳半個刀械贖物等件又據六合儀徵等營縣捕獲匪犯冷太冷二劉志榮等十五名亦係沿江劫搶訛詐擾害之積匪以上各犯均須澈究嚴懲臣已行提來省委員確審辦理又

據揚州瓜洲等營併江都縣拏獲倚匪王正標等十八名併鎗械贖物等件此內有當場拒傷兵役供認販鹽爲生者顯有積慣巨梟隱匿不吐未便任聽狡展致滋疎縱查兩淮運司駐劄揚州緝捕梟販尤其繁務臣已劄委該運司俞德淵就近督飭府縣研訊確情按律嚴辦以示

懲儆所有捕獲盜匪梟梟分別委審懲辦緣由
謹附片以

聞謹

奏

道光十一年三月初八日具

奏四月初一日奉到

硃批可見廢弛已久汝係朕特加信用之人能如此
存心爲國宣力不但永承恩澤朕亦得知人善任
之名當勉之又勉有加無已以副朕望欽此

覆查運庫墊估銀數相符俟分別歸補摺子
奏爲覆查運庫墊用及估碍銀數相符應俟綱引
疏通分別歸補恭摺覆

奏仰祈

聖鑒事竊臣接准軍機大臣字寄道光十一年正月
初二日奉

上諭鍾靈奏清查覆覈明確一摺着陶澍卽將該運
庫實墊各款及估碍銀款詳晰查明單內所開數
目是否屬實其墊估銀款如何歸補及綱引如何
疏通併着陶澍妥爲籌畫覆議具奏原摺單均著

抄給閱看等因欽此

臣

遵查前任鹽政鍾靈單開

截至上年十月初二日止除已經劃抵外共計
墊用過銀四百九十九萬七百三十四兩零內
估碍正雜各款銀二百九十二萬五千二百兩
零外支各款銀二百六萬五千五百三十兩零

覈與

臣

前會同

欽差

臣

王鼎寶與查奏數目相符惟所開墊用估碍

各款頭緒繁多此外有無未入清查及轆轤不
清之項復經札飭運司確加查覈妥議去後茲
據新任運司俞德淵查明原奏各款按照庫簿

底冊逐細覈對併訛錯遺漏詳覆前來臣查運
庫歷年估墊各款皆因向來正雜不分籠統支
用漫無章程嗣因鹽引壅滯課難足額其按年
應用之項不能不隨時支發致將應解京外正
雜各款亦俱挪動無存歷任鹽政總期鹽務日
有起色即可分年帶徵是以屢次

奏請寬展詎意疲敝情形年甚一年不但舊欠無
補抑且新虧踵至重重套搭庫貯全空經前鹽
政福森奏請徹底清查委員設局按照歷年庫
簿逐款鈎稽分別造冊存案其中有由運司覈

明實應墊用者有由商人出名公同借領者皆
因有緊急支用不得已而墊發年分遠近不同
商名更換靡定若將借領之款照追則已乏之
商代賠幫公之項徒事析揚於公無濟兼恐竭
蹶倍形無能辦運如責令通河分賠其中亦有
新僉商人更覺無辜受累力有難支必多沮退
招募不前惟有暫停舊欠杜絕新挪輕鹽價以
冀暢銷俾課銀獲歸實貯所有墊佔前項銀兩
應請仍照臣會同臣王鼎寶與前次奏奉

俞允原議辦理同上年庚寅綱墊佔已丑錢糧一併

暫緩攤帶俟三五年間力加整頓鹽務得有起色察看情形如果暢銷再行

奏明帶徵歸補如現在商人有挾貲告退及因事革退者其人既退是已無歸補之望仍按其公領專領是否有名分別卽行追繳以免將來庫款無著至綱引疏通惟在嚴禁江船腳私糧船夾帶私梟販運現均次第查辦容_臣辦有頭緒隨時分別

奏咨謹將_臣接奉

諭旨覆查墊佔銀款相符仍應暫緩帶徵各緣由恭

摺覆

奏伏乞

皇上聖鑒謹

奏

道光十一年三月初八日具

奏四月初一日奉到

硃批戶部議奏欽此

運庫積年混淆情形摺片

再查定例各省藩庫均以上年徵存銀兩留爲
次年支用遇有不敷仍報部另行籌撥惟兩淮
運庫向係以本年徵款作本年支用往往不敷
支給挪正墊雜以致庫款混淆積年套搭竟成
有借無還歷次清查墊佔悉由於此現在辛卯
三月開綱計已缺用一季兼商力久疲必俟楚
西滯引銷售始得有銀轉運計須七八月方能
暢銷完課而此半年內應支各款除浮費業已
刪去百數十萬外所有減存辦公各數均係絲

絲入扣不能再少如各官養廉各省匪費官兵
鹽菜公用經費等項均須按時給發以資辦公
必得預爲籌備方免臨時缺乏又滋墊估查從
前綱引科則之外多有攤派多則百萬少亦數
十萬本年科則較前大減併刪減攤派各款僅
於每引內酌攤一二錢有零以爲前項應支各
款籌備歸補借墊之用如有餘剩卽留爲下年
支發庶不致仍前挪動正款而庫項可期漸清
矣合併附片陳明謹

奏

道光十一年三月初八日具

奏於四月初一日奉到

硃批酌覈妥辦果能庫項一清無須挪動正款方爲
正辦欽此

道光十一年五月初六日准

戶部議

奏臣等查兩淮應徵正雜款項均係按綱徵收而
旨議外支各款則係按年支用近年綱引滯銷課難
足額而按年應用之銀仍須隨時給發運庫動
支銀兩向係正雜不分籠統支用輾轉挪墊以

應急需遂至前積未清後虧踵接遞年佔碍庫貯全空此墊佔之銀所以與積欠之銀均成懸宕也上年冬間經

欽差大臣王鼎等會同該督籌議請將歷年積欠及墊佔各款合共銀五千餘萬兩一併暫緩攤帶俟將來鹽引暢銷再籌歸補經

臣

部奏令查明

歷年欠款確數究有若干造冊報部再行覈議在案嗣據前任鹽政鍾靈將歷年墊佔銀兩數目查明具奏欽奉

諭旨飭交該督查覈今據奏稱截至上年十月初二

日止除已經劃抵外共計墊用過銀四百九十
九萬七百三十四兩零內估碍正雜各款銀二
百九十二萬五千餘兩外支各款銀二百六萬
五千餘兩覈對庫簿底冊均無錯訛遺漏其中
有由運司覈明實應墊用者有由商人出名公
用借領者現在既不能飭令已乏之商代賠幫
項又未便責令通河分賠惟有暫停舊欠杜絕
新挪所有此項墊估銀兩同上年冬季庚寅綱
墊用已丑錢糧請仍照該督會同臣王鼎等原
議一併暫緩攤帶俟三五年間鹽引暢銷再行

帶徵歸補等語查前項銀兩既據該督覈明係
因緊款支用不得已而墊發一時未能歸補自
係實在情形應如所奏辦理惟以運庫實貯之
銀輾轉挪用復成虛款與歷年積欠並未徵解
在庫者不同尤未便任其久懸仍請

勅下該督一俟鹽引暢銷迅卽趕緊籌補不得稍有
因循致滋延宕經此次清查以後如現在商人
有挾資告退及因事革退者亦應如該督所奏
仍按其公領專領是否有名分別追繳以重庫
項至上年冬季庚寅綱墊估已丑錢糧其數若

千原奏內未經聲敘應令一併查明確數造冊報部以備稽覈其附片所稱現在辛卯開綱商力久疲計須七八月方能暢銷完課本年應支各款均須預爲籌備以資辦公方免臨時缺乏請於科則之外每引內酌攤三錢有零以爲應支各款之用等語查兩淮外支各款如各官養廉各省匯費官兵鹽菜公用經費等項均係覈入科則內起徵如果年額年清自可足敷支用今該督以本年辛卯開綱計須七八月方能暢銷完課現因無銀支發以每引內酌攤三錢有

零以資墊用係爲本年七八月以前外支各款
預爲籌備起見應令恪遵

諭旨酌覈妥辦惟鹽務經此番整理課款自可全清
計下屆開綱所有外支各款均可於原定科則
內按數動支是不但毋庸佔碍正雜之項而庫
項一清竟可無須懸墊此次酌攤之銀卽係額
外盈餘其應作何支用或帶完前墊款目仍應
令妥定章程奏明辦理以昭覈實併令該督此
後務使課銀獲歸實貯永遠不准再有墊佔名
目如仍蹈前轍挪動正款卽將該運使嚴行叅

辦併將該督一併議處以清積弊而肅濫網等
因奉

旨依議欽此

動撥貧民口糧銀款摺子

蘇撫會稿

奏爲動撥

恩賞貧民口糧銀款仰祈

聖鑒事竊照前護撫臣梁章鉅任內接准部咨道光十一年正月初四日內閣奉

上諭上年江蘇省江寧等州縣衛積水受旱業經降旨分別緩徵小民自可無虞缺乏惟念今春青黃不接之時口食未能饒裕着加恩將沛縣勘不成災之坊一等十二里乏食貧民賞給一月口糧以資接濟用示朕惠鮮懷保澤洽歉區至意該部卽

遵諭行等因欽此欽遵轉行併刊刷贍黃曉諭一
面飭查應需銀數請撥去後茲據江寧布政使
陸言詳稱據徐州府知府劉鴻翱稟稱沛縣道
光十年秋被水旱勘不成災之坊一等十二里
乏食貧民欽奉

恩旨今春賞給一月口糧約需銀一萬六千八百兩
稟請撥發等情查司庫正項內道光七年分地
丁一款現有存銀應請卽於此內撥用設有不
敷卽於司庫正項銀內酌量撥其貧生日糧
銀兩照例於存公款內支用事竣造報請銷詳

請

奏明撥用前來臣等覆加查覈據請口糧銀一萬六千八百兩係計口授食之需自應預爲籌備
恭懇

聖恩俯准按數撥用以資散放事竣覈實報銷如有
餘剩報部撥用除飭該管道府督令印委各員
趕緊查明戶口覈實散給務使貧民均沾實惠
仍隨時嚴密訪察如有胥役尅扣胥濫情弊立
卽據實叅辦所有動撥沛縣口糧銀款緣由謹
合詞恭摺具

奏伏乞

皇上聖鑒謹

奏

道光十一年三月二十日會

奏於四月十九日奉到

硃批另有旨欽此同日奉到道光十一年四月初五日內閣奉

上諭陶澍等奏請動撥恩賞貧民口糧銀款一摺上年江蘇省沛縣被水被旱勘不成災之坊一等十二里乏食貧民曾經降旨令春賞給一月口糧茲

據該督等查明約需銀一萬六千八百兩着照所請加恩准其於道光七年分地丁款內撥用設有不敷卽於司庫正項銀內裁撥其貧生口糧銀兩照例於存公款內支給事竣造冊報銷卽飭該管道府督令印委各員趕監查明戶口覈實散給務使貧民均沾實惠仍隨時認真嚴密訪查如有胥役剋扣胥濫情弊立即據實參辦毋稍姑容欽此

酌擬鹽務人員改補調署章程摺子

奏爲酌擬鹽務人員改補調署章程仰祈

聖鑒事竊臣前於遵

旨覆奏鹽務官員另議通變一摺欽奉

上諭陶澍奏籌議稽察商人及鹽務各官員各情一摺兩淮鹽政現經裁撤所有巡捕等及各項人役俱着全行裁撤以省繁費至鹽務各官除場大使外僅有南北監掣二員通泰海運判三員司經歷知事庫大使各一員巡檢二員額缺甚少不必裁省其候補之員人數太多着該督另議變通或改

歸地方或回籍候調至現任人員卽照州縣之例
隨時量爲調換務期人地相宜倘或無可調換着
於地方官遴員以資振作該部知道欽此伏查兩
淮額設監掣同知二缺運判三缺鹽場大使二
十三缺批驗大使二缺經歷庫大使知事各一
缺巡檢二缺遇有出缺各就本班候補人員挨
次補用巡檢二缺向以知事借補至委署章程
則以大使經歷知事合爲一班相間輪委又有
巡緝差使如秦壩子鹽溱潼海安等處均係屆
期更換約計每班各畱五六十員已足敷差委

今兩淮候補各班積至一百五十餘員之多不
獨補缺無期仕途壅塞卽差遣亦難遍及優劣
無從周知况當此刪減繁費之時豈容虛糜薪
水自不得不另議變通之法所有歷屆分發人
員內除名次在前及現已委署到班或先經記
功超委之員自應酌畱其熟悉鹽務情形諳習
勾稽出納者亦俱畱資驅策此外雖於鹽務未
經諳練而於地方公事尙能明晰可期造就者
擬請分別改撥以期漸次疏通查定例運判到
省在五年以上尙未得缺如該員補足知縣捐

項銀兩請以知縣改補者亦准該督撫遇有中
簡知縣調補所遺員缺仍按從前到省日期與
各例試用人員一體比較到省先後題請署理
如才堪勝任竝無貽誤候試署年滿出具切實
考語送部引

見可否准其補授之處恭候

欽定至鹽運司經歷補足鹽大使銀數後以改捐上
庫之日與輪班應補之捐納試用鹽大使比較
到省先後補用何例到班卽與何例比較以上
運判經歷二項補捐銀兩各按各例分別辦理

得缺後俱照現缺陞轉又各省鹽運司知事到
省試用在五年以上尙未得缺遇有巡檢典史
應歸月選之缺以從前到省日期與捐納試用
人員統較日期先後酌量試署實授後卽照現
補之缺計俸陞轉遇鹽運司知事缺出不得再
以該員請補各等語今兩淮改補係因缺少人
多兼資節省起見所有運判知事二項應請無
論已未試用五年均准呈請改補運判仍照例
繳足捐項統俟扣滿五年期限再與輪班應補
之員比較到省先後補用至大使經歷等官雖

向未辦有改補地方成案似可援照選判知事
之例推廣通行擬以大使經歷改補州判及布
政司庫大使按察司知事府經歷縣丞五項內
有應繳捐項者均令其照例繳足仍按班次先
後補用現在江蘇省候補知縣首領佐雜不過
一百數十員竝未多於鹽務而額缺較多數倍
且已經奏明停止分發可無擁擠之虞如此一
爲變通官常旣可肅清人材亦不致廢棄地方
鹽務均有裨益俟奉到

諭旨後飭令就近在藩運兩司衙門具呈由臣衙門

據詳分別題咨辦理倘各員中有情願回籍候
調者聽其自便至丁憂告假及差務未竣各員
另由鹽運司隨時覈辦再現任各鹽場大使有
稽查竈煎催徵折價之責最關緊要實與地方
州縣無異現在各員有人地未宜者亟應遴員
更調裨資整理惟實缺中一時竟無員可調未
便因循貽誤應請於地方現任府經縣丞中擇
其廉能勤幹者隨時調署或酌量人地彼此對
調或於候補知縣中揀員借補仿照河工大挑
知縣借補佐雜之例以原銜陞轉其撤回各員

卽以府經縣丞改補總期稱職相宜共圖振作
以仰副

聖主厘懷鹽務勉勵周詳之至意所有酌擬改補調
署章程謹具摺奏陳伏乞

皇上訓示遵行謹

奏

道光十一年三月二十六日具

奏四月十八日奉到

硃批該部議奏欽此

吏部咨

云

云

臣

等查運判知事定例在省試用

已滿五年尙未補缺運判准其補足知縣銀兩
改捐知縣鹽知事准其改補地方巡檢典史均
須扣足年限始准改捐改補現在兩淮當整飭
之時自宜量爲變通應如該督所請嗣後兩淮
運判知事二項如試用未滿五年均准照例先
行改捐改補仍俟按扣限滿方准補缺至該督
又稱鹽大使經歷等官似可援照運判知事之
例擬以鹽大使經歷改補州判及布政司庫大
使按察司知事府經歷縣丞五項內有應繳捐
項者均令其照例繳足仍按班次先後補用倘

各員中有情愿回籍候調者聽其自便至丁憂告假及差務未竣各員另由鹽運司隨時覈辦等語臣等查兩淮試用鹽大使經歷人數衆多易滋壅滯應准其照運判知事之例以地方官改補惟查江蘇無選缺州判併無按察司知事缺分未便准其改補應以布政司庫大使府經歷縣丞三項內指明一項改補無須再扣年限此內有應補繳銀兩者仍令照例補交各按原班以從前到省日期與本項試用人員較先後補用改補之後不得仍以鹽官補用亦不得仍

照原銜陞轉以示區別而杜率混倘各員中有
情愿回籍候調以及丁憂告假出差等項應由
該督等隨時辦理該督又稱現任各鹽場大使
有人地未宜者亟應遴員更調惟實缺中一時
竟無員可調應請於地方現任府經歷縣丞中
擇其廉能勤幹者隨時調署或酌量人地彼此
對調或於候補知縣中揀員借補其撤回各員
卽以府經歷縣丞改補等語臣等查各場大使
有稽查竈煎催徵之責實與州縣正印無異與
府經歷縣丞僅司巡緝者不同若以地方佐雜

調補鹽場正印殊於體制未協應毋庸議至現
任各場所大使如果人地未宜令該督先儘現
任各場內揀選對調如不得人或卽撤回以候
補場員請補如再不得其人卽准其於地方候
補委用大挑議叙捐納拔貢教習教職各班知
縣內詳加揀選擇其才情練達曉暢鹽務者酌
量借補借署扣滿歷俸三年方准照原銜陞轉
如知縣原班到班亦聽該督等酌量題補其現
任撤回各員卽以地方府經歷縣丞指定一項
酌量補用於補班亦尙無窒碍臣等伏思地方

鹽務各有各班鹽務雖宜擇人經理而地方尤
關緊要現當兩淮鹽務改歸總督管理章程初
定不得不議准所請俾資整頓其餘有鹽務省
分不准援照奏請更改至兩淮亦俟鹽務得人
候補各員漸次疏通仍照舊例各按各班補用
不得常川紛紛改補以昭限制而杜趨避等因
道光十一年四月十八日奉

旨依議欽此

孟濱河工程請緩至來年接續興挑摺片

再常州府屬武進縣境內運河之北有孟濱德勝深港三河係引江潮濟運灌田之要道因年久澶塞江潮未能灌輸以致農田受困運道淺滯經臣陶澍前護撫臣梁章鉅先後親往勘明必需及時挑浚估需工費銀二十萬六千七百餘兩借動糶變緩漕米價銀兩分年攤徵還款於上年十一月奏蒙

俞允當卽轉飭該府縣督率董事分段領銀挑辦併飭司道隨時查察在案嗣據報定期開工人夫

市經下塘卽值雨雪連綿自上年十二月至本年正月河內積水盈滿實屬人力難施直至二月初旬天時晴霽先將工段較短之德勝藻港兩河多集夫車趕緊戽澗如式興挑勒限趕辦臣程祖洛到任後復卽催飭認真辦理惟孟瀆河工段最長淤墊最甚現在河內積水至六七尺之深連日雨猶未止車戽不易轉瞬卽交夏令夫役亦須歸農體察情形實屬工程艱鉅若責令趕辦必致草率從事應請緩至本年秋後農隙之時接續興挑一律完工以期費不虛糜

用昭慎重理合附片陳明伏乞

聖鑒謹

奏

道光十一年三月二十六日具

奏四月十八日奉到

硃批另有旨欽此同日奉到道光十一年四月初八

日內閣奉

上諭陶澍等奏請緩挑孟瀆河等語江蘇孟瀆德勝
灤港三河前經該督等懇請動項興挑茲據奏稱
德勝灤港兩河現經勒限趕辦惟孟瀆河工程艱

部知道欽此
本年秋後接續撫辦一律完工毋許草率偷減該
部知道欽此

趕赴清江浦催放重運漕船摺片

再重運漕船業經開放頭塘以次前進現在浙省幫船暨江廣幫船亦俱跟接前來惟今春清黃二水接連盛漲爲向所未有揚州以上挽運維艱必須加緊償行方免開壩時吸溜之虞經臣分派各員疊劄嚴催現將署中要件趕辦卽於三月二十六日馳赴清江會同漕臣吳邦慶河臣張井督飭灌運以免遲悞所有署中日行事件照例委江寧布政使陸言代拆代行其一切應行

題奏及緊要事宜仍由臣衙門包封清江嚴辦謹

附片陳明伏乞

聖鑒謹

奏

道光十一年三月二十六日具

奏四月十八日奉到

硃批知道了欽此